

Yu Sí, Hòmber Nò!

Den pasado, tabata komo sifuera mundu a kaba si un mucha muhé soltera a sali na estado. Tantu e mayornan, komo famianan, bisinanan...mihó bisá, komunidat kompleto...a insistí ku e amantenan mester kasa.

Ma e pensamentu ei a kambia; e stèndert ei ta konsiderá antikuá. Nos ta biba den un era di supuesto libertat seksual. Relashonnan seksual no ta reservá pa matrimonio mas. Si e mucha muhé tin e "mal suerte" di sali na estado, ban spera ku e yònkuman lo ta dispuesto di sikiera biba kuné.

Awendia un otro konsepto a logra infiltrá e balornan moral di hopi hende na nos islanan. Kiko e konsepto aki ta? Hende muhé soltera ta buska un yu, sin ningun klase di interes pa mantené un relashon permanente ku tata di e yu. Pa nan, ni matrimonio, ni bibamentu ta un opshon deseabel. Nan mentalidat pa ku e sekso maskulino a para bira "Duná mi un yu, anto laga mi na pas!"

Ta opvio ku rais di e fenómeno aki ta bai hopi profundo.

Un sikólogo a opservá ku en general, hende hòmber ta usa amor komo as pa haña sèks; miéntras hende muhé ta usa sèks komo as pa haña amor. Den otro palabra, un hòmber ta **pretendé** ku e ta stima un dams pa e por gosa sèks. E mucha muhé ta deseá di haña e amor di e hòmber, i e ta kere ku lo e por haña esei si e ta aseptá di tene relashon seksual ku e yònkuman.

Si e konsepto ei ta bèrdat, ta komprendibel dikon algun dama soltera tin e mentalidat aki. Un hòmber ta papia dushi dushi i ta haña su gana (sèks). Ma e mucha muhé ta keda desepshoná. E no a haña loke e ta desea (amor) en kambio pa sèks.

Kon ku bo bir'é, e sekso femenino ta esun ku ta keda pèrhudiká. E ta esun ku ta sali na estado. E ta esun ku tin ku suportá e doló di parto. E ta esun ku mester bringa pa kria su yu; pasobra hopi biaha, e mucha hòmber ta sigui su bida normal, bandonando e mucha muhé i ignorando su responsabilidat komo tata. Ta fásil pa komprendé pakiko algun hende muhé awendia, despues di añanan i dékadananan di opservá i sufri na man di tantu hende hòmber irresponsabel, por krea e mentalidat fadá i frustrá, "Duná mi un yu, anto laga mi na pas!"

Si, e mentalidat aki ta komprendibel. Ma tòg e no ta un pensamentu sano. Maske kon atraktivo e konsepto aki por zona pa hende muhé, nan tin ku realisá ku tin konsekuensianan serio si nan ta opta pa sigui e filosofia aki.

Ta un echu bon dokumentá ku en general, un mama soltero lo tin muchu mas problema finansiero ku un mama kasá. Pa un mama soltero por kria su yu na un manera drechi e tin mester di sèn. Ma pa e por haña sèn e tin mester di un trabou, i den hopi kaso e no tin diploma pa esaki. Kisas e ta hañ'é obligá di dependé di ònderstant, un suma ku pa luna no ta mashá.

Hende muhé ku e mentalidat aki tambe mester kòrda ku kada yu tin mester di un modelo maskulino. Un yu hòmber, opservando su tata, ta bin komprendé e ròl di un hòmber, esposo, i tata. E promé hòmber ku un yu muhé ta stima ta su tata. E amor di un tata pa su yu muhé lo tin un afekto positivo bida largu. Ma si e yu muhé ta falta e tata su amor, e lo buska amor i aseptashon di otro fuente...hopi biaha di hende hòmber ku ta probechá di dje. Un dama ku ta deseá lo mihó pa su yunan lo bandoná e mentalidat di evitá matrimonio, ma haña yu si.

Tambe ta na su lugá pa kòrda ku hañamentu di yu sin ta kasá ta keda piká segun Skritura santu. Dios ta prohibí tur relashon seksual fuera di matrimonio. Nos Kreador, sabiendo kon hende por funshoná optimal, a duna mandamentunan na hende pa nan bienestar. Un hende ku ta violá Dios Su leinan, tempran òf lat lo sufri e konsekuensia di su desobediensia. "Un hende por tuma kandela den su skochi sin kima su paña? Of un hende por kana riba karbon kayente sin kima su pia? Asina ta esun ku drumi ku esposa di su próhimo; ken ku mishi kuné, no ta keda sin haña kastigu" (Proverbionan 6:27-29).

Ta bèrdat ku hopi hende muhé a keda desepshoná ku e aktitut di hende hòmber ku ke sèks, ma no tin amor. E aktitut egoista ei ta piká. Ma e reakshon di hende muhé tambe ta egoista pa buska yu fuera di e konteksto di matrimonio. I maske hende por haña e reakshon "yu si, hòmber nò" aseptabel, tòg segun Dios Su evaluashon, esei tambe ta piká.